

李文忠公奏稿

李文忠公奏稿

卷之七十五目錄

再請勦辦熱河教匪給獎摺

光緒十八年七月初二日

海防練軍請銷摺

光緒十八年七月初二日

與俄連接電綫定約摺

光緒十八年七月十八日

保舉將才摺

附請單
光緒十八年七月二十一日

山海關藥釐溢支請銷片

光緒十八年七月二十一日

陳季同請開復摺

光緒十八年八月十八日

潘鼎新請建專祠摺

光緒十八年八月十八日

借給朝鮮銀十萬兩摺

光緒十八年九月十三日

奏保桂本誠片

光緒十八年九月二十四日

漠河金廠請獎摺

光緒十八年九月二十九日

蘆引展限復額摺

光緒十八年九月二十九日

朝鮮續借銀十萬兩摺

光緒十八年十月二十二日

覆陳朝鮮商務獎案摺

光緒十八年十月二十二日

籌議永定河石隄工程摺

光緒十八年十月二十八日

淮軍報銷摺

光緒十八年十月二十八日

軍需交涉洋務片

光緒十八年十月二十八日

淮軍水師報銷片

光緒十八年十月二十八日

擬設新張電綫摺

光緒十八年十一月初五日

機器局報銷摺

光緒十八年十一月二十五日

請獎漢納根片

光緒十八年十一月二十五日

潘鼎新奉賢建祠片

光緒十八年十二月十二日

收留山東退還機器片

光緒十八年十二月十九日

籌撥新開館

光緒十八年十二月二十三日

李文忠公奏稿卷七十五

全集一之七十五

桐城吳汝綸編錄

再請勦辦熱河教匪給獎摺

光緒十八年七月初二日

奏為查明勦辦熱河教匪尤為出力武職各員仍請照原保給獎
恭摺仰祈

聖鑒事竊准兵部咨稱奏定章程內開克復城池擒斬要逆在越
級保升此案所保越級各員核與定章不符應照章改獎並將駁
改之下得祥等三百五十四員開單咨會前來臣維部臣所議自
為謹守例章慎重名器起見惟論克復城池始准越級保升之例
則熱河全境本無城池與內地情事有異至論疊次擒斬要逆則
實與例章相符臣從前勦辦東西捻逆亦無克復城池之事而每
遇奏捷越級請保無不仰荷

恩前蓋流賊圍制之難力戰窮追之苦比於頓兵堅城之下猶爲
過之去冬熱河教匪突起旬日之間糾集數萬人蔓延千餘里佔
據蒙府僭稱偽號其凶燄固與捻匪無殊而隆冬嚴寒山谷險阻
較之內地倍形艱苦朝陽縣及建昌所屬之貝子府上下畏皋赤
峰所屬之烏丹城等處皆於失陷後次第攻克各州縣險要之區
全爲賊踞築牆固守崇墉屹立攻勦之難迥非尋常賊壘可比各
將士拚死力爭晝夜攻戰竟於一月之內悉數殲平著名首逆全
行擒斬向來用兵無如此神速痛快者幸不至老師糜餉釀成燎
原肅清藩服捍蔽

畿疆關係大局尤非淺鮮是以提臣葉志超隨摺奏保之副將潘
萬才等均係越級請升悉荷

恩允並蒙

特旨宣示以勵其餘是各將士艱苦力戰情形久邀

聖明洞鑒此次彙保各員同在前敵疊次苦戰核其勞績實與前保各員相同但以官秩較卑人數較多未能同時列敘曾經葉志超將先予存記彙齊請保等情於摺內聲明在案今事定之後乃不得一體論功慮無以激勵戎行昭示大信查同案所保文職各員並經吏部核准論名器之嚴則文重於武論戰陣之力則武多於文文員已一律蒙

恩武員轉大半駁改相形之下未免向隅疊經提臣葉志超咨請申奏臣復令嚴加刪減茲據覆稱將存記略次之嚴宗富等五十員請從部議核改其可得祥等二百九十八員均係前敵苦戰尤爲出力疊經存記無可刪除葉志超親在行間見聞真確既據列敘勞績代乞

恩施未便墮於

上聞合無顯懇

特恩俯准將卞得祥等仍照原保給獎以示鼓勵之處出自

恩施逾格分別開單咨明兵部查照外理合恭摺具

奏伏乞

皇上聖鑒訓示謹

奏

海防練軍請銷摺

光緒十八年七月初二日

奏爲查明天津海防練軍光緒十七年分收支各款照章造冊請銷恭摺仰祈

聖鑒事竊據天津支應局司道詳稱天津練軍及大沽葛沽北塘海口各礮臺防營並雲字營馬隊營務處小隊應需餉項向由津海關六成洋稅招商局稅洋藥釐捐東海關協餉長蘆鹽斤復價正雜課各項內隨時籌撥樽節支放前因東海關六成洋稅湊付洋債無款協解改在天津釐捐項下動用經部覆准業將光緒十六年以前收支款目疊次奏咨准銷在案查十七年新增用款已專咨立案至應支餉乾薪糧等項並大沽等海口礮臺經費以及設局辦公租賃民房添置帳棚旗幟號桂采買製造軍火器械悉照奏定章程歷年准銷成案核實支放茲造具光緒十七年分收

支細數清冊詳請

奏咨前來臣逐加覆核自光緒十七年正月起到年底止舊管項下上年墊支不敷銀八百三十兩零新收各款並本案扣收平餘銀共三十八萬二千五百三十六兩零內除撥還上年墊支不敷銀八百三十兩零計實收銀三十八萬一千七百五兩零開除支款悉照定章毫無浮濫應歸戶部核銷銀三十四萬四千十九兩零工部核銷銀三萬五千三百六十三兩零合共銷銀三十七萬九千三百八十三兩零應存銀二千三百二十二兩零已支發十八年餉項列入下屆滾接造報其奉部核准歷年墊支不敷銀三萬一千一百七十八兩零仍於冊內列報俟另案核辦再行開除所有光緒十七年天津海防練軍收支餉銀請銷緣由除清冊咨部外理合恭摺具

奏伏乞

皇上聖鑒敕部核銷謹

奏

與俄連接電綫定約摺

光緒十八年七月十八日

奏為遵

旨與俄國使臣妥商中俄邊界連接陸路電綫訂立約款恭摺具

報仰祈

聖鑒事竊臣於光緒十八年三月二十八日准總理各國事務衙門咨以俄國使臣喀希呢赴總署申請議接海蘭泡瑯春等處陸路電綫請派大員會商辦理奉

硃批著派李鴻章與俄國使臣妥商奏明辦理欽此欽遵臣即劄派總辦電報事宜津海關道盛宣懷與俄使所派之駐津領事官王厚在津商訂磋商數月議立華洋文條約十款大致與前任俄使庫滿所訂草約十一款不甚懸殊當將議訂接綫條款一併鈔咨總理衙門詳加覆核悉臻妥洽本年閏六月十五日已由該衙

門鈔錄條款進呈奉

硃批依議欽此並由該衙門繕譯清文咨送到臣卽由臣處照繕
漢文於七月初四日在津先行畫押蓋印交俄領事寄京與俄使
喀希呢印押其俄文法文則由該使在京先行畫押蓋印仍交俄
領事寄津與臣印押齊全已於七月十五日各自分執臣查中國
陸路電綫創自光緒六年經營十餘年布滿各省瞬息萬里官商
稱便惟丹國大北公司海綫先於同治十年由香港廈門迤邐至
上海一並新嘉坡檳榔嶼以達歐洲名爲南綫一通海參崴山俄
國亞洲早綫以達歐洲名爲北綫俄丹早有連綫之約嗣後英國
大東公司水綫亦由福州至上海英丹復有合辦之約其始英丹
兩國湊集鉅款製造水綫來華原欲併收中國通商各口之電利
故同治九年英使威妥瑪曾有各海口准其設立水綫之議迨各

行省自設陸纜併拆去英丹在滬粵已成之陸纜彼乃知中國已
能自守境內之權利不可復奪遂欲獨專中國與外國往來電報
之利迨我之吉林黑龍江纜成與俄之東海濱境內咫尺毗連該
公司深慮中俄纜接分奪其生計惟恃俄丹交密並有海參崴約
章在前俄雖欲自利仍不能不保護丹國之利而各國洋人之在
中國者聞中俄接纜皆願陸纜與水纜跌價相爭使洋人寄洋報
可佔便宜此不特俄丹所不允卽中國電局亦無力與之跌鬪且
丹英水纜到中國已二十餘年彼洋商無法使水纜跌價亦何能
獨使陸纜跌價以遂其漁人得利之謀現在中俄定議上海福州
廈門香港該公司本有水纜處不與爭跌留其生計該四口以外
各口電價亦不准水纜公司爭跌庶使華纜略分其利如以後水
纜減價則中俄電纜亦同時照減辦理甚爲平允

往返函電互商均屬妥協至展造恰克圖綫應用造綫經費甚鉅
並常年養綫用款繁重擬飭總辦電報事宜盛宣懷勸諭華商電
報公司設法添招商股二十萬歸商認辦以免另籌官本以後邊
界既經接綫凡京津等處出洋電報必須將京津等處至海參崴
琿春恰克圖內地報費由我酌量全行豁免祇收條款內應分來
往經過之電費自應仍歸華商電報公司收取除抵過路免內地
報費外卽以抵展造恰克圖電綫經費及以後此綫常年修巡之
費以期持久而免廢弛此又中俄接綫以後所擬之辦法也所有
議立中俄接綫條約二分以一分咨送總理衙門以一分存留臣
衙門備案理合專摺由驛覆陳伏乞

皇上聖鑒訓示謹
奏

保舉將才摺

光緒十八年七月二十一日

奏爲保舉將才以備

簡用恭摺仰祈

聖鑒事竊維治兵之要選將爲先將才之選戰守並重從前隨臣
勦辦粵捻身經百戰之將大半歸農或已物故其留在防營出力
者尙有勲勞久著未經得缺之員當此時事方殷宿將日少亟應
及時湔拔溯自沿海辦防以來非洋各軍自大沽北塘蘆臺山海
關東至奉天之旅順口大連灣南至山東之威海衛分築礮臺近
復接辦煙臺膠州防務布置營隊操演鎗礮爭效西洋最精之式
臣於十七年校閱海軍周歷各口親見所作臺工及新式操法精
堅靈捷實爲前此所無足以折衝禦侮蓋自頻年防日防俄防法
皆在戒備勤動之中日蒐軍實而申儆之未嘗少懈法越之役沿

海騷動敵卒不敢以一船北窺八年十年兩次赴援朝鮮上年勦辦熱河教匪並能徵調迅速剋期奏功屢荷

聖慈優加獎擢各將士等訓練於平日感激於

恩知故能氣象常新材能競奮茲就各營將領記名提鎮內擇其尤爲出色者九員出具切實考語繕列清單敬呈

御覽各該員或久經戰陣資勞益深或分辨海防工操精熟均屬才能出眾堪勝專崗之任若蒙

天恩俯准存記擢用洵可備緩急而資鼓勵理合恭摺具陳伏乞

皇上聖鑒訓示謹

奏

謹將記名提鎮堪勝專閫各員出具切實考語彙繕清單敬
呈

御覽

記名提督趙懷業久當大敵智深勇沈現統銘軍駐大連灣礮臺
布置精嚴廉明果毅尤爲出色之將

記名提督衛汝成紀律精詳才略開展統帶馬步隊驍果能戰殲
馭得宜所向有功足備干城之選

記名提督梅東益樸實精勁調度有方遇事能知大體其才可當
一面

記名提督馬玉崑才力驍健人亦體面勤懇回馳驅各省遠及
伊犁歷練最多現統毅軍駐防旅順可爲提督宋慶齊人

記名提督孫顯寅身經百戰僕誠耐勞講求利器每能以少勝眾

記名提督黃仕林驍勇無匹從軍數十年屢受重傷幹練老成
記名總兵呂本元久爲騎將臨敵制勝謀勇兼優治軍辦事極有
條理

記名總兵張文宣志趨遠大熟諳西人練兵練器新法現居威海
衛前敵布置臺壘動合機宜

記名總兵韓照琦年壯才優勇敢善戰練隊精明

山海關藥釐溢支請銷片

光緒十八年七月二十一日

再戶部具奏各海關加徵洋藥釐金暨併徵稅釐刪減經費應即
提還歸款案內山海關除已奏免撥還項下尙有加徵期內溢支
銀三千一百九十六兩七錢七分併徵以後溢支銀二千九百四
十七兩五錢五分二釐二毫六絲內有應除已於光緒十三年奏
銷案內報明開除湄雲輪船煤炭不敷撥動銀一千五百二十三
兩六錢二分二釐二毫六絲下餘開支局用巡費及善舉等項其
銀一千四百二十三兩九錢三分經前署關道希賢查明均係實
用詳請咨銷經部議駁轉行在案覆查加徵期內溢支銀三千一
百九十六兩零係前道廣蔭支作局用巡費併徵以後溢支銀二
千九百四十七兩零係前署道廷彥以是年湄雲輪船應用煤炭
不敷動支銀一千五百二十三兩零下餘一千四百二十三兩零

支作善舉巡費局用其涓雲輪船煤炭不敷委因是年差使絡繹屢奉調赴天津旅順差遣又不時出洋巡緝用煤較多原款不敷故由釐金項下借撥業經造報至溢支善舉局用巡費未曾加徵以前歷任均按每斤抽銀一錢六分藉爲各項費用至加徵以後巡緝尤加嚴密員丁書役仰給薪工勢難再取諸商是以每斤割支銀一錢六分迨改併徵仍係照常巡緝費用不能減少前署道廷彥於十三年五月初九日到任照舊割支至是年十二月始奉部咨以十三年正月初九日起洋藥稅釐併徵以後不得按箱割提局用等項該關每年准給巡船等銀二千四十兩而前項溢支之款廣蔭廷彥已支於未奉部議以前撥發在先奉文在後並非違章濫用至輪船煤斤不敷亦係查照向辦成案動撥實用實銷委無浮冒據該關道善聯詳請奏免追繳前來臣查自來立法祇杜將來

非繩既往錯誤於既立法以後咎無可辭動用於未定章以前情
非得已若將早經支發之公款繩以隨後定立之部章事本兩歧
豈能合轍果使任情濫豈容免予追還惟查廣蔭廷彥所支善
舉局用巡費及輪船煤斤不敷等項支發既在定章之先而又無
一不係實在應用之款自應免其追繳況廣蔭去任已久廷彥病
故有年徒事追呼亦屬無益合無仰懇

天恩敕部將刪減山海關洋藥釐金經費廣蔭任內溢支銀三千
一百九十六兩七錢七分廷彥任內溢支銀二千九百四十七兩
五錢五分二釐二毫六絲仍准核銷以清積案附片具陳伏乞

聖鑒訓示謹

奏

陳季同請開復摺

光緒十八年八月十八日

奏為革員陳季同逋欠洋款業經清還懇予開復恭摺仰祈
聖鑒事竊已革花翎總兵銜福建補用副將前充駐法使署參贊
陳季同因借欠巴黎銀行法銀十萬佛郎經出使英法大臣薛福
成奏參奉

旨革職查辦經總理各國事務衙門議奏請將該革員提解天津
勒限嚴追務令自行清償欽奉

硃批依議欽此臣於上年七月間准總理衙門恭錄咨會並准閩
浙總督將該革員於九月內委解到津聽候追辦當經發交水師
營務處直隸候補道羅豐祿等嚴密管押飭將所欠洋債趕緊設
法清還續又查出該革員另欠法國克蘇蘇廠法銀二萬佛郎莫
梅伯金銀鋪法銀一萬六百佛郎連所欠巴黎銀行之款計共約

銀二萬六千餘兩該革員自洋回華資囊告罄竭力挪湊僅得銀二萬兩法使李梅赴總署催促甚急嗣該使有事來津羅豐祿撥照西洋欠債減成之例與之商酌該使頗多要挾遂另託巴黎銀行商董奧人倫道呵向原欠各行廠關說於閏六月初間將銀二萬兩匯往與各行廠議妥減成攤還所有陳季同欠債一律清訖據羅豐祿譯呈各行廠收銀電報臣猶未敢違信復飭電屬法國前駐天津領事白藻泰赴外部詢問並飭將各行廠收銀筆據寄津查核茲據羅豐祿譯呈白藻泰覆該道信兩附法國外部大臣李波復信并洋文原件敘明陳季同所欠之債前請外部代追者已一律清還銷案並由倫道呵將三處行廠商人親筆洋文收據一併寄來此案現已了結查地方官虧挪倉庫錢糧限內全完例准歸於本案開復今陳季同逋欠洋款係屬私債與虧挪正項錢

糧有閒該革員由福建船政學生出洋多年從事使館洞悉外洋情形深通法國語言文字實爲洋務人員中不可多得之才欠債既已還清似可宥其前愆以觀後效合無仰懇

天恩准將已革花翎總兵銜福建補用副將陳季同原參革職處分開復出自逾格

慈施除將譯出自藻泰李波信函並各行廠收據鈔送總理衙門備案外理合恭摺具

奏伏乞

皇上聖鑒訓示謹

奏

潘鼎新請建專祠摺

光緒十八年八月十八日

奏爲已故統兵大員功在地方輿情愛戴籲懇

天恩准其捐建專祠恭摺仰祈

聖鑒事據天津縣在籍紳士浙江候補道徐士燮等聯名呈稱已故廣西巡撫潘鼎新前在直隸勦辦捻匪卓著戰功同治四年捻匪逼近畿郊天津爲馬賊驟集出沒之區時虞句引內犯中外惶惶該故撫統率所部鼎軍由滬航海抵津聲威大振人心始定七年之春西捻張總愚突竄畿境該故撫首先入援在保定河間一帶防剿固守北面藩籬其夏捻逆由東省回竄天津復會合郭松林楊鼎勳兩軍倍道抄前迎頭痛勦偪賊回竄津郡始獲保全嗣嚴防滄州減河使逆氛不得北擾該故撫平生戰績天下其聞而此數端則津人所目睹而身受者軍興以來統兵大員故後均准

於立功省分建立專祠該故撫功德在人擬請在天津捐建專祠列入祀典呈請具奏前來臣查已故廣西巡撫潘鼎新於同治元年募立鼎軍隨臣東下始自平吳迄於剿捻疊著戰績實爲淮部大軍與兵事相終始勦捻之役馳逐四年轉戰五省勞苦功高一時稱最而兩次入衛

畿輔赴援之速尤爲中外所推四年夏初親王僧格林沁殉難曹州賊屯聚濮鄆之間蔓延東明長垣界內蓄謀北犯直境震擾屢奉

諭旨徵兵入援曾國藩方駐徐州各軍皆赴東豫以南臣在兩江總督任內奏派該故撫統率所部十營剋日航海赴援徑抵天津旋由景州德州一帶過嶽南下直境始無寇警特蒙

諭旨獎勵謂能視國如家顧全大局曾國藩疏稱有此一軍可以

壯畿輔之聲威可以補籌畫之迂緩其爲當時所重如此西捻戰事多在近畿該故撫始援保定繼援天津防護

陵寢屏蔽

京師全局所關尤非淺鮮回憶七年春初張總愚由晉竄直時東捻甫經剿定奉

旨休息將士未及兩旬諸將大半假歸聞警卽令該故撫剋日北援時賊已連陷饒陽邢州逼近保定方謀分股北竄涿易東竄津沽該故撫於正月十六日自東阿拔隊馳抵饒陽正遇東竄之賊迎擊大勝抄出賊前徑趨保定遮蔽易州滿城一帶賊旣不得北竄其東竄者繼爲諸軍所遏回竄西南其先官文崇厚衍秀等連疏告警情形岌岌若非該故撫赴援迅速大局幾不可問同時起行之善慶等所部馬隊猶後二日始入直境蓋師行之速一時

所無也天津爲著名富庶之區賊所注意旋於三月杪由東昌渡運疾捲北趨冀乘我之不備時該故撫已追賊而南屢捷於長垣內黃濬滑莘冠之交臣卽檄令會合郭松林楊鼎勳等倍道急馳繞由北路向南兜截以蔽津沽衝要該故撫與各軍議以賊銳意北竄非兜前截擊不爲功雖霖雨積潦軍士勞苦所不遑恤遂於二十八九等日疊在荏平高唐平原陵縣吳橋南皮東光滄州靜海一帶沿途邀擊或綴賊後或出賊前連日搦戰疾行竟於四月初五日先抵天津賊亦腐集城南一敗之於衛南窪再敗之於楊柳青賊知不可圖卽由鹽山慶雲回竄海豐該故撫仍慮其乘隙北擾復在滄州之捷地滅河東岸引水開淤直達於海築長牆八十餘里屏障滄靜海各屬津防自此屹然賊西不得渡運北不得竄津遂爲官軍蹙向東南盤旋於高唐禹城臨邑之間不百日

而全股蕩平論者謂非防勦得力不能奏功如此之速是役也潘鼎新與郭松林楊鼎勳並以力戰著聞而發謀則皆由於潘鼎新臣當時奏臚詳敘戰狀歷歷具在可覆按也伏查淮軍勦捻各統將如郭松林楊鼎勳等歿後並奉

旨准建專祠潘鼎新戰功與郭松林等相同而其兩次赴援之速論功實在諸將之上天津尤其力戰保全之地該紳等感念前績懇請捐建專祠足見公論之孚未便壅於

上聞合無籲懇

特恩俯准爲該故撫潘鼎新在天津地方捐建專祠列入祀典由地方官春秋致祭以彰盡烈而順輿情出自逾格

慈施理合繕摺具陳伏乞

皇上聖鑒訓示謹

奏

奏

奏

借給朝鮮銀十萬兩摺

光緒十八年九月十三日

奏爲借給朝鮮銀十萬兩由華商出名訂立合同限期拔還恭摺
密陳仰祈

聖鑒事竊朝鮮庫藏空虛自通商以來洋人乘隙誘以借債之說俾以關稅作抵意欲暗持該國利權若果聽其辦成隱患甚大光緒十六年閏二月間臣與總理各國事務衙門會奏遵議要件摺內第五條聲明此等舉動一有萌芽卽應設法阻止如實係軍國要需應由中國代借以保利權而杜流弊等因在案是年朝鮮遣託洋員向英美日本各國貸款均由總理衙門及臣分電各出使大臣設法阻止但朝鮮實係貧窘徒事束縛不爲代籌恐致其心愈離亦非

聖朝字小之義本年四月間辦理朝鮮商務委員存記簡放海關

道袁世凱假滿赴韓經過天津臣密授機宜面諭隨時相機妥辦
嗣據該道以朝鮮前因購買輪船息借德商洋債未能清償利息
日增索逋日急計欠至十萬之數由該國外署督辦閱種默函請
向華商告貸在韓華商資本無多難集鉅款請在出使經費項下
撥借銀十萬兩由殷實商家出名訂立合同由朝鮮海關按期拔
還息亦以次遞減電請核商前來當經電商總理衙門覆准照辦
并以利息宜從輕年限宜從速屬飭妥議稟辦即經轉電該道遵
照茲據稟稱商准借銀十萬兩月息六釐限八十箇月按月分償
完結由派任朝鮮稅務司與華商同順泰號出名擬具合同底稿
送呈朝鮮國王核定因所欠德債係轉運漕米輪船價值訂明由
轉運總務官出名與同順泰訂立合同該道復將所擬底稿略加
刪改列具七款聲明該總務官係奉該國政府之命議貸繕就合

同兩本約同該總務官鄭秉夏同順泰商人譚以時當面畫押分
用印章該道與外署督辦閩種默同時監訂各加印押其合同一
本附卷一本交閩種默存外署備查照繕底稿呈請奏咨等情臣
查朝鮮借款若免其生息恐歸還必多遲延而官款取息於體統
又未甚合該道疑於出使經費項下撥借由華商出名僅令認息
六釐較洋債倍爲輕減且由海關拔還則操縱尤可在握陽示羈
縻暗資鈐制辦法尙爲妥洽於保護屬藩大局殊有裨益臣與總
理衙門往返電商意見相同除由總理衙門飭令江海關道撥借
出使經費銀十萬兩交同順泰號轉付仍由臣督飭商務委員袁
世凱按期認真催交勿任延欠並將合同稿咨送總理衙門查核
外理合恭摺密陳伏乞

皇上聖鑒謹

奏

奏保桂本誠片

光緒十八年九月二十四日

再花翎二品銜候補道桂本誠於同治九年到省疊次委辦永定河漫口大工光緒十一年委辦東明黃河善後各工十三年委辦潮白河漫口大工並著成效十六年府尹臣以該道熟悉河務調赴通州防守平家疇大隄十七年委辦順屬工撫疏河築隄事竣經府尹奏保十月二十一日奉

旨桂本誠著交吏部帶領引見欽此今屆委辦永定河漫口大工堵築水旱口門三處修完兩岸險要各工多處工程極爲繁鉅估計力從節省工料務求堅實上下奔馳晝夜催趨不及四十日卽已合龍程功之速爲向來所未有該道樸誠老練能耐勞苦爲守兼優於河工閱歷尤深機宜尤熟臣在直隸逾二十年歷屆治河以臬司周馥存記道吳廷斌及該道桂本誠最爲得力目今直境

各河淤淺已久治理不易必須得人隨時設法補救稍紓民困如桂本誠者實爲不可多得之才查十六年永定河漫口合龍臣以吳廷斌勞績最著奏奉

特旨交軍機處存記遇有道員缺出請

旨簡放等因欽此桂本誠資勞並深與吳廷斌相等僅與加銜加級似不足以示鼓勵且其銜亦無可再加應如何

擢用之處出自

慈施逾格非臣所敢擅擬理合附片具陳伏乞

聖鑒謹

奏

漠河金廠請獎摺

光緒十八年九月二十九日

奏為黑龍江漠河金廠創辦三年期滿著有成效謹將出力文武員弁遵照奏定章程分別酌請獎敘繕單恭摺仰祈

聖鑒事竊照光緒十二年十二月間前署黑龍江將軍恭鏜等密陳漠河金礦亟應及時開采以杜外人覬覦欽奉

寄諭飭臣籌辦當經議定章程十六條遴派道員李金鏞總辦礦務奏蒙

飭下總理衙門會同吏部戶部議准覆奏內開用人一條以漠河為邊遠苦寒之地人皆視為畏途金廠襄辦需人非尋常局務可比若非破格優獎不足以示鼓勵在廠經辦各員俟三年後如果實效昭彰准擇其尤為出力者照異常勞績從優酌保其出力較次之員照尋常勞績保獎以示區別等因奉

旨依議欽此欽遵在案計自光緒十四年十二月開工日起扣至十七年十二月止三年期滿據現辦局務候選知府袁大化查明在事出力文武各員開單稟請奏獎前來臣查漠河地方三面斗入俄界距俄國新設之博克諾付克屯及阿勒巴金城僅一江之隔該處金苗頗旺久爲外人所垂涎往年中俄匪徒私自開挖雖經派兵驅逐孽芽未淨光緒十三年春閩李金鋪帶同員司由黑爾根入山勘度地興工締造經營時歷二載規模始具開廠後招回流民數千募練護礦防勇一營並於漠河口各處建造房屋廣集商販沿江平曠之地設法墾種屯牧並興以絕域窮荒人迹罕到之地兵民輻輳商賈繁興屹然爲邊陲重鎮十六年秋閩李金鋪病故後奏派袁大化接辦力持危局規畫井然三年以來先後出金砂六萬二千餘兩除陸續歸還借款分給股商官利外所

有勇夫餉械糧運及各局經費均由該廠籌給不費公家之款並
提存餘利解充黑龍江軍餉以伸報效實屬辦理得法成效昭彰
自來謀國遠圖不外興利實邊當該廠未經開辦以前俄人越界
私采出入自由伺隙抵瑕意殊叵測該處距將軍都統所駐均極
寫遠防範難周時虞侵佔今自開礦以來上至奇乾河下至愛琿
沿江二千餘里弁丁夫來往不絕所募護礦營勇訓練精強沿
邊卡倫聲勢聯絡與黑龍江北岸俄城隱然對抗外以折強鄰窺
伺之漸內以立百年富庶之基其有益於

國計民生殊非淺鮮在事文武員弁及司事人等遠役遐荒備嘗
艱苦漠河向無人煙建置之難則平地赤立購運之遠則千里孤
懸往來轉解必須取道俄境彼族多方掣肘口舌百端礦丁驕悍
性成鴛馭招徠殫盡心力兼以地居邊徼瘴癘毒惡凝寒中人易

生疾疫取金之硃夏則積水冬則厠冰鑿險經幽艱難前此
道員李金鋪同知姚嶽崧知州劉域林等均積受寒溼病歿差
次歷年司事兵役相繼物故者更多眾皆視爲畏途各該員弁始
終奮勉罔顧身命勞苦勝於內地十倍今當三年期滿礦務日有
起色局勢逐漸開拓自應遵照奏定章程破格優獎以期鼓舞人
心藉收羣策羣力之效查該廠總分各局十餘處在事員司不下
數百人茲謹核實刪減擇其尤爲出力者酌照異常勞績獎敘凡
出力較次之員仍按尋常勞績請保未敢一概從優理合彙繕清
單恭呈

御覽仰懇

天恩俯念漠河金廠事屬創辦關係緊要邊防迥非尋常局務可
比准照所請獎敘出自逾格

請
慈施總辦委員候選知府袁大化先充該廠提調辦事認真力任
勞怨接辦局務堅苦卓絕支拄艱危洵屬懋著勳勤有裨時局應

旨將該員免選本班以道員不論雙單月遇缺儘先卽選並加二
品銜以示鼓勵除應給下把等項照章咨部註冊並飭取各員詳
細履歷分咨外理合會同黑龍江將軍臣依克唐阿恭摺合詞具
陳伏乞

奏
皇上聖鑒訓示謹

蘆引展限復額摺

光緒十八年九月二十九日

奏爲蘆綱各岸帶銷原停引目實難復額請照原案推展五年以

恤商艱而保現課恭摺仰祈

聖鑒事竊照長蘆所屬直豫兩省引岸前於道光二十四年停引

十萬道嗣後轉經

奏准推展五年光緒九年十二年十五年部議僅展三年應於十

八年底限滿經臣飭司預籌復額旋據運司李邦楨詳稱蘆課關

係餉需現值時艱帑絀但能加增一引卽多一分入款斷不敢稍

涉因循惟蘆商本鮮殷富直豫各岸又多瘠區光緒十六年大水

爲災實爲近數十年所未有元氣至今未復本年又遭災歉戶口

凋殘情形更非昔比以致銷數愈滯且額設引目過多除提繳減

停外尙有現行六十六萬餘道從前併引加斤鹽包節次增重道

光二十八年清查案內每引又加鹽一百五十斤核計所加斤數
實占額引四分之一其應交課款亦自一兩二錢遞增至二兩數
錢於是商累日甚雖督同運司竭力整頓查禁夾帶偷漏飭
各州縣認真緝私嚴辦梟匪並由臣派撥練軍分駐協捕但民間
日食有定餘鹽無處融銷是以光緒十六年僅出庫引六十萬六
千餘道十七年僅出庫引五十六萬八千餘道本年秋關將竣僅
出庫引五十六萬八千餘道不特未敷現行六十六萬餘道之數
且十七年出引較十六年尤爲減少現查庫存歷年積引至五十
七萬一千餘道其已運岸之鹽亦復存積壘引雖出庫鹽實未
銷舊引既難疏通新引何從增益況各商每屆尙須包賠庫存積
引之課若遠行復額再令包賠十萬道課帑商力難支勢必參懸
相繼無裨實事有礙大局據綱商楊俊元等懇情稟懇推展該司

詳加體察確係實情若僅歷三年爲期太迫請照原案再行推展
五年俟限滿察看核辦等情具詳請奏前來臣查蘆綱現行引六
十六萬餘道疊經設法疏銷每年仍積滯數萬道未能如數領運
其勢實難再加然核計鹽包斤數及交納課帑銀數則較原額有
增無減於公家尙無所損頻年水災甚重銷數益滯商力極艱該
司季邦楨謂遽議復額無裨實事有礙大局確係實情相應仰懇
天恩俯准將原停引十萬道自光緒十九年起仍照原案推展五
年以恤商艱而保現課仍督飭運司認真設法整頓冀積引逐漸
疏通庶於課餉商情兩無窒礙理合恭摺具陳伏乞

皇上聖鑒訓示謹

奏

朝鮮續借銀十萬兩

光緒十八年十月二十二日

奏爲朝鮮續借銀十萬兩仍由華商出名訂立合同按期由朝鮮

海關拔還恭摺密陳仰祈

聖鑒事竊前因朝鮮庫藏空虛借欠德商洋債未能清償利息日

增索進口急由該國外署督辦函商告貸據辦朝鮮交涉商務

存記簡放海關道袁世凱具稟請示經臣會商總理各國事務衙

門在出使經費項下借給銀十萬兩由在韓之同順泰號華商譚

以時出名訂立合同月息六釐限八十箇月由仁川海關分期拔

還陽示羈縻暗資鈐制業經密奏奉

旨著照所請該衙門知道欽此欽遵在案嗣又據袁世凱電稟以

准朝鮮外署督辦趙秉稷函稱該國積欠日本銀行息款及美商

購船價目尙有洋銀十四萬餘元之多亦宜早爲清償仍懇始終

代籌再向華商續貸十萬兩應訂合同仍照前次商酌妥訂等情
請示遵辦臣查日本切近朝鮮內懷陰謀外示親密美係民主之
國動以自主勸人朝鮮君臣愚闇無知每易受其誘惑該兩國欠
項必須及早清理視德商洋債尤爲急要否則積欠愈久息款愈
增措繳倍難更易受其挾制並查由仁川至漢城商貨陸運維艱
水路尤形遲緩日本商人現用小輪船二隻託名韓船往來漢江
利權獨擅華商同順泰號等欲藉此次續貸合同訂款列入准其
集湊華韓股分購造小輪船駛行江路轉運華商貨物並由朝鮮
每年撥交漕米十萬石分期承運冀得水腳津貼且免外人藉口
此亦係收回利權之舉當經臣電商總理衙門飭令該道袁世凱
妥商辦理旋據該道與朝鮮政府議定續借銀十萬兩仍每月認
息六釐由釜山海關拔還因釜山稅銀不及仁川之旺寬限二十

簡月定以一百箇月拔完本息並允華商購造小火輪船在仁川
漢城運貨往來仍由同順泰商人譚以時與朝鮮轉運衙門續訂
合同并將購駛小輪事宜另立規條彼此書名畫押袁世凱與趙
乘稷公同監訂加蓋關防印信其合同規條分存駐韓商署及朝
鮮外署備查照繕底稿稟請奏咨前來臣查所訂合同規條均甚
周妥實與光緒十六年閏二月間臣等在京會議辦法相符應准
續行借給銀十萬兩俾得清理日本美國各債免被藉端要挾致
為日後之累於保護屬藩大局洵有裨益除由總理衙門電飭上
海道仍在出使經費項下撥借銀十萬兩交同順泰號具領轉付
仍由臣督飭該道袁世凱按期與前次借款一併認真催交并將
合同規條稿咨送總理衙門查核外理合恭摺由驛密

奏伏乞

皇上聖鑒謹

奏

覆陳朝鮮商務獎案摺

光緒十八年十月二十二日

奏爲部議辦理朝鮮商務獎案刪減各員實係海外當差期滿異常出力懇

恩俯准仍照原保給獎恭摺仰祈

聖鑒事竊查派赴朝鮮辦理商務及駐防兵船經理電報文報海關山力文武各員前屆三年期滿經臣彙案請獎旋奉部議以此次請獎文職三十二員已逾部定二十員之限將列保在後之費邦屏等十二員撤銷等因知照到臣當經轉行遵照茲據總辦朝鮮交涉通商事宜存記簡放海關道袁世凱稟稱吏部原奏朝鮮通商總辦分辦委員三年期滿奏請獎敘比照出使外洋之例以二十員爲額原係酌中核定惟朝鮮辦理商務交涉與出使東西洋各國情形不同統計漢城龍山仁川釜山元山麻浦總分各署

辦理商務者其三十餘員此外駐防兵船接遞文報及辦理電報
關稅不下二十餘員則皆出使東西洋各國所未有人數加多實
由於此部定二十員之額專指辦理商務一項而言其餘固未併
計在內此次請獎三十二員係將各項當差期滿之員彙案辦理
商務人員僅居其半尙有未經期滿各員仍須俟扣足年限再行
續獎按照部定員數實未及額前開清單以官階之大小爲先後
其開列在後者實亦勞績卓著所請獎敘並未優於常格今因秩
銜微末致被刪除殊無以昭平允應請仍照原保給獎等情請奏
前來臣查朝鮮屬在東藩國勢貧弱強鄰環伺日肆狡謀自派員
駐紮以來顯與維持陰爲鈐制交涉事件動多煩難該委員等遠
役海外當羣疑震憾之交多方因應操縱合宜較之出使外洋循
例辦公者艱苦倍嘗勞勩更著該國雖疊經煩擾而恪守藩服不

爲動搖上以彰

中朝統轄之權下以弭各國侵陵之患。有裨大局。良非淺鮮。至電報文報海關兵船四項人員。本不在辦理商務之內。然電報文報消息。賴以靈通。事機乃無貽誤。關員以司征權。兵船以助巡防。尤足維體統而壯聲威。此皆出使他國所無。而控制朝鮮。則斷不可少。該員等當差勤奮。與辦理商務人員同一出力。未便獨令向隅。是以請獎員數不能不稍有加增。若必拘定二十名之額。刻以相繩。似不足以鼓舞人心。收策羣力之效。該道袁世凱所稟均係實在情形。臣覆加確核。此次請獎各員。毫無冒濫。礙難刪減。相應懇

懇

天恩。俯准將部議撤銷之費。邦屏等十二員。仍照原保給獎。出自

逾格

慈施並請

飭部嗣後辦理朝鮮商務人員准俟扣足三年期滿隨時覈實請獎毋庸預定額數致有掣肘其辦理電報文報海關兵船各員均准隨案擇尤附獎仍飭將各該員到差日期先行查明立案以備稽核除各員履歷前已咨送外理合恭摺具

奏伏乞

皇上聖鑒訓示謹

奏

籌議永定河石隄工程摺

光緒十八年十月二十八日

奏爲籌議永定河北岸頭工上汛接築石隄工程恭摺陳仰祈
聖鑒事竊臣承准軍機大臣字寄光緒十八年八月二十四日奉
上諭給事中洪良品奏永定河水性湍急每易潰決其北岸頭工
上汛關繫尤重請接連石景山二十四號自北上汛頭號起至十
號止添砌石隄十里以資捍衛等語著李鴻章遴派熟悉河工之
員前往該處詳細履勘妥籌具奏等因欽此臣查十六年北上二
號漫口大工經派臬司周馥前往督辦該司熟悉機宜卽飭馳赴
該處會同現辦工程之存記道桂本誠永定河道萬培因詳細勘
度據該司道等勘得北上一汛隄長十五里中閒河而寬六七里
首尾兩段僅寬三里勢成兜灣舊建石隄須做長十三里過此兜
灣抵十三號之利堡土岡而止乃得形勢永定濁流湍悍每遇橫

河頂衝搜刷培根深至二丈數尺石隄必須深築根腳使其不能
搜翻連日探驗河底其一二號內挖下一二丈偶見石子三號以
下純係細沙石隄難於生根惟有就沙開槽釘椿滿築灰土以爲
基址挖深則水源旺出工作倍難該給事中原奏謂河底全係石
子自係未經勘驗之言查勘盧溝橋上下遠年石隄其大塊條石
需費最鉅其次則用成片石塊不拘方圓尺寸疊砌成隄其整齊
堅厚者皆百年以外之工至今未壞今擬仿此做法採取片石用
灰壘砌需費較省該處距采灰石各山遠者四十餘里近亦二十
餘里官采毋庸給價惟給開鑿人工及搬運車腳力細核道路
遠近載運斤兩所費已屬不貲現擬石隄做法自頂至底共高三
丈底寬一丈六尺頂寬四尺隄底築灰簽格以資挈托隄頂加築
灰土以防雨水滲入連頂底灰土並計高三丈四尺二寸隄後留

築素土其成隄頂寬四丈底寬九丈一尺所擬做法丈尺均係從
省核算不能再減該司道等親往采石各山履勘並而詢土著匠
夫調查從前工冊就現在修補段落察驗撙節估計每片石隄做
成一丈應需銀三百七十兩八錢三分八釐三毫計自北上頭號
至十三號利埜地方止計程十三里共二千三百四十丈需銀八
十六萬七千七百六十一兩零隄後每里應做丁字石格六道需
銀一萬七千五百餘兩共銀八十八萬五千二百六十餘兩此外
尚有官役薪飯匠夫犒賞席棚土房紙張油燭雜用一切約銀四
萬兩原奏謂十里石隄需費不過十數萬金亦係未經分析考核
之言此項石隄工程每年凌伏秋三汛不便創槽十月至正月凍
結期內不便砌灰歲計做工祇有五六箇月開工以後諸事順手
必須四年始可辦成由該司道等繪具圖說詳覆前來臣查北岸

頭工乾隆嘉慶年間因工段險要兩次奏改分爲上中下三汛而
上汛尤形喫重歷屆歲費料價四五千金大汛搶險尙難預計隄
岸純是白沙十里以內難覓膠土汛漲搶護幾於人力難施實爲
各汛最險之工一遇漫溢輒衝刷

南苑牆垣右安門彰儀門一帶皆爲水阻卽如十六年二號漫口
被災之廣堵築之費是其明證該給事中謂籌治永定河莫亟於
北岸上汛自是有鑒於此今擬添建石隄藉資捍衛洵爲防患未
然一勞永逸之計近年河工人員亦多有持此議者總慮工程浩
大鉅款難籌竊維此工屏蔽

京師且關下游民生利害仰荷

聖明垂問何敢以工艱費鉅諉爲可緩之圖直隸本屬缺額之區
加以連年工賑頗仍實無餘力如果舉辦必須請撥部款惟部庫

同一支紬九十餘萬之鉅帑即使分年指撥恐亦籌措爲難臣再
四思維與該司道往復籌度惟有分段擇要舉辦之法測量該處
地勢自一號至八號河底高於平地一丈數尺至三四尺漫溢則

必奪溜水勢正對

苑門爲患最重九號至十三號河底低於平地一二三四尺即使
溢出尙易搶護且距京略遠爲患較輕茲擬先將最要之一號至
八號接造石隄工長八里共一千四百四十丈連每里添修石格
共需銀五十四萬四千八百七兩零計三年可以造成由部分年
撥款每年約需銀十九萬至薪賞雜用等項仍需銀三萬兩卽由
直隸湊撥尙可竭力勻籌其九號至十三號工程應俟以上八號
工竣後察看情形再行酌辦似此擇要分段辦理則請款較少程
功亦速謹繪具北岸上汛形勢圖說恭呈

御覽伏懇

敕下部臣詳籌議復一俟撥定款項即可從速興工現估工程物料係按時價實用估計力從撙節未便以例價相繩將來定議開辦再由臣選派熟諳工程大員詳細覆核督率辦理除咨戶工部外理合繕摺覆陳伏乞

皇上聖鑒訓示謹
奏

淮軍報銷摺

光緒十八年十一月二十八日

奏爲光緒十七年分淮軍收支款目列爲第二十案造冊報銷摺
單恭摺仰祈

聖鑒事竊照淮軍收支款項業經截至光緒十六年十二月底止
列爲第十九案報銷於光緒十七年十一月三十日具奏奉

硃批該部議奏單併發欽此旋准部復按冊核銷在案伏查淮軍
分駐直隸沿海各口要區並奉天之旅順口大連灣山東之威海
衛及調征口外留防熱河等處計護衛親兵武毅仁盛銘楚護軍
親慶馬步水師共五十一營同水陸各哨棚併護運餉械弁勇統
歸淮軍案內造冊彙總請銷今自光緒十七年正月起截至是年
十二月底止列爲第二十案所有統領營哨官弁員名勇夫開收
總數駐防處所先經造冊分咨軍機處暨戶兵工部備查又將支

給正雜款項增裁數目遵照新章每三箇月開報一次咨送各部
查核其淮軍馬步水師各營並隨營辦事支應等差文武官弁親
兵勇夫薪費口糧倒補馬匹柴薪車價駝騾喂養卹賞水陸轉運
價腳夫工采辦製造用款油艙船隻經費犒賞正雜各款均循前
案楚軍營制與奏定章程歷局非銷例案分別截清起止所開銀
數概按湘平折實庫平接續造報飭據准軍報銷局司道逐款清
釐查核舊管銀六十萬七千三百三十六兩一錢有奇新收銀二
百十七萬五百七十七兩二錢有奇登除並附銷銀四十二萬八
千一百九十七兩一分有奇開除正雜等項遵照部議酌定軍需
報銷章程各歸各部核銷計應歸戶部核銷銀一百八十四萬八
千六百三十七兩八錢有奇應歸兵部核銷銀三萬五千一百二
十兩五錢有奇應歸工部核銷銀九萬三千一百四十八兩八錢有

奇統共請銷銀一百九十七萬六千八百九十九兩二錢有奇應
截存銀三十七萬二千八百一十七兩一錢有奇已接支光緒十
八年正月起淮軍馬步水師營哨正雜餉項並購製中外軍火器
械工價預儲軍米等項動放無存歸於後案舊管項下滾接造報
等情具詳請

奏前來臣查淮軍各營分駐直隸天津大沽北塘蘆臺至山海關
沿海一帶並奉天之旅順大連灣山東之威海衛各海口及調征
口外留防熱河等處其各海口修築礮臺擇要扼守練習後膛鎗
礮水雷魚雷各新法采用西洋利器講求制勝機宜俾北洋全局
聲威既張敵情自懾實爲消患無形之計分布海疆千餘里內衛
京畿門戶外控藩屬鄰邦有事得資應援尙稱緩急可恃餉項乃
計口授食之需關繫至重屢屆報銷案內截存銀兩皆係設法節

縮並將月餉酌量緩欠誠以近畿海防關係重大無時敢忘戰備
不得不稍留餘地藉應急需現計欠餉仍有一百五十九萬四千
九百七十六兩有奇若將截存銀兩儘數抵補不敷甚巨況次年
各軍食米須先期發價赴南省購運方免臨時缺誤此項米價向
在截存項下酌撥近因各省關額解淮餉短少往往入不敷出遂
至截存銀兩動放無存惟有隨時諄催各省關實力籌解冀免遇
事束手所有造報十七年正雜款項均係循照歷屆准銷成案據
節支發實用實銷並無絲毫浮冒除分造細冊咨送各部核銷並
將以後用款接續造報外理合專摺具

奏並繕飭明清單恭呈

御覽伏乞

皇上聖鑒謹

奏

軍需交涉洋務片

光緒十八年十月二十八日

再准軍海防各營洋鎗礮隊教習人等辛工礮費輪船薪糧並運
解礮械輪船水腳及天津行營機器製造局委員等薪糧公費工
匠工食物料購價等項多與洋人交涉均屬無例可循至操練後
膛洋礮拉礮車馬喂養夫工係照奏定章程倒補馬匹例價分別
核實支給業將截至光緒十六年十二月底止用款附片

奏銷在案伏查此次造報光緒十七年正月起截至是年十二
月底止第二十案內前項各款遵照新章將增裁支用數目彙入季
報清冊先後咨部立案茲據該司道等按款復加查核均係照案
接續支給並奉文飭發毫無浮冒遵章將支用款目各歸各部核
銷計應歸戶部核銷教習人等薪糧公費匠工拉礮馱運車馬喂
養等銀十萬四千四百六十一兩四錢有奇應歸兵部核銷輪船

薪糧夫工船價運腳保險費倒斃馬價等銀三萬四千一百七十八兩二錢有奇應歸工部核銷油節小修礮費購製外洋各項料物器具價值等銀四萬三千一百十九兩五錢有奇其計請銷銀十八萬一千七百五十九兩二錢有奇照案分晰另造支銷細冊

詳請附

奏前來臣查前項准軍各營洋鎗礮隊教習通事工匠人等辛工購買外洋物料價值運腳各款多與洋人交涉無例可循仍應查照歷屆成案據實請銷除將細冊咨送總理衙門戶兵工部核銷外伏乞

聖鑒謹附片具

奏

淮軍水師報銷片

光緒十八年十月二十八日

再淮軍水師營哨各船扣至光緒十七年春秋開均屆應須修換之期前經照章飭撥經費興修業將動用款項數目列入季冊咨部立案茲據淮軍報銷局司道等復加查核所用修費與定章及准給銀數均屬無浮計應歸工部核銷銀四千二百七兩二錢有奇專案造具支銷細冊詳請

奏前來臣查前項修理舳板戰船用款均照定章核實支放並無浮冒除將細冊咨戶工部核銷外理合附片具陳伏乞
聖鑒謹
奏

擬設新疆電綫摺

光緒十八年十一月初五日

奏爲擬設新疆省城至喀什噶爾電綫以速邊報恭摺仰祈
聖鑒事竊查光緒十五年上等會奏請設甘肅電綫摺內聲明新
疆自收回伊犁之後俄人往來絡繹南路喀什噶爾與英屬北印
度接壤中隔布魯特坎巨提各部落交涉日繁應節節預籌設綫
通報惟道里懸遠需費過鉅祇能分段接辦先將西安電綫展至
肅州本年三月復因新疆遠處邊陲遇有緊要文報由肅州轉遞
動需時日聲息遲滯經總理各國事務衙門籌撥款項由臣飭令
電報總局購料鳩工將肅州電綫展至新疆省城八月開定購外
洋料物到滬卽派熟悉委員勘路並催分運木料已值冰雪凝凍
須開春三月後冰融趕緊加工約明歲五六月告竣在總理衙
門函商以俄使喀希尼屢次昭商帕米爾勘界語極桀驁將來作

何歸宿尚無把握天山南路情形重於北路境外零星回部此後
事變尙多烏魯木齊去京八千數百里喀什噶爾又去烏魯木齊
四千里文報過遲卽電詢事件亦往往逾月若值邊情緊急之時
消息不靈必致事機多誤除關外電綫應飭如期趕辦外其烏魯
木齊西抵喀什噶爾電綫不通仍形隔閡應再籌款乘此鳩匠興
工之候爲事半功倍之謀一氣呵成實於邊防大局裨益等因臣
查係籌邊至要之圖不可再緩俄國都城東至伊犁喀什噶爾等處如
此爲遠皆有電報瞬息可通我若仍賴驛遞因應之圖必致遲速
懸殊卽經督同總辦電報事宜津海關道盛宣懷按圖查核關外
電綫原擬由哈密經吐魯番以達新省現議展綫可由吐魯番至
庫車阿克蘇以達喀什噶爾城約計三千八百餘里道途愈遠轉
運愈難戈壁崎嶇工程艱鉅所有運費工費必更加增且外洋料

價均以金鎊核作銀兩比較前辦黑龍江雲貴電綫之時加至十分之三聞木料尙可沿途砍伐各營助以兵力略可節省仍照向章約估需銀二十八萬餘兩現值庫款支絀新疆瘠苦斷難籌此鉅資臣與總理衙門籌商擬於江海關所存出使經費暨海軍衙門生息應還出使經費項下各提銀十四萬兩以資應用如蒙俞允應請

旨敕下總理各國事務衙門海軍衙門迅速照撥由臣轉發盛宣懷購辦電料派員查勘綫路於新疆電綫設成之後卽行一氣接辦並由新疆撫臣陶模分飭沿途各州廳縣預爲采辦木料按里分屯以備取用各項經費核實動支如有不敷由臣等另行籌給除撥電歲修各費並伊犁北路應否續展再行分別議奏外所有擬設新疆省城至喀什噶爾電綫緣由謹會同陝甘總督臣楊昌

潛新疆巡撫臣陶模合詞恭摺具奏伏乞

皇上聖鑒訓示謹

奏

機器局報銷摺

光緒十八年十一月二十五日

奏為天津機器局光緒十六年分動用經費照章造冊報銷恭摺
仰祈

聖鑒事竊照天津機器局經費奏明動撥津海東海兩關四成洋
稅截至光緒十五年止業將收支款目造冊奏報經部核復准銷
並將十六年支給薪工等款分別咨部立案茲據該局前福建藩
司張夢元等將十六年分應行造銷各冊分晰開報計上屆存銀
十二萬七千八百八十九兩有奇本屆連閏十三箇月共收四成
洋稅招商局船稅並江海關洋藥釐金及各省撥還軍火等價銀
三十一萬七千七百十三兩有奇共支銷銀三十二萬八千六百
七十九兩有奇應存銀十一萬六千九百二十三兩有奇業經定
購外洋器料並添建工程應歸付清價腳及工竣之年報銷所有

本屆應銷各款仍照向章各歸各冊計全案收支總數及員弁司
事工匠夫役人等薪工爲第一冊購辦物料續建工程及核付保
險運腳京差等項爲第二冊收支物料分項造報用存物料作爲
光緒十七年分舊管爲第三冊製成軍火撥發各項爲第四冊撥
給各船薪糧物料及行營製造局用料爲第五冊神機營撥用物
料爲第六冊又十六年疊准總理海軍衙門飭派安設外火器營
鐵路工程並修理

西苑及

頤和園等處電燈

昆明湖輪船及運送洋水龍等項價腳盤費銀兩前已聲明彙入
十六年常年經費冊內請銷另造清冊一分附呈查核其製造軍
火仍造冊咨送總理各國事務衙門備查至製造各項器械皆仿

西洋新式所用工料難以例價相繩循照歷屆章程實用實銷詳請具奏前來臣復加確核委係核實動用並無絲毫浮冒北洋籌辦海防拱衛

設輔各營需用軍火爲費不貲加以創立海軍凡鐵艦快船魚雷艇水雷營及各口礮臺應需軍火名目甚多關繫尤重該局爲水陸各軍取給之源各項火藥子彈等件既須供支常年操防之用尤須豫備意外不虞之需該局員均能覈實認真督飭工匠加緊製造惟應領額款僅指津東海關四成洋稅及海軍衙門撥給滬關洋藥釐金款少用多時虞竭蹶現又添造西洋新式長礮鋼彈新式栗色火藥雖海軍章程內奏明應月撥銀八萬兩乃各省關解難足額未能如數勻撥惟有督飭局員就款搏節動用勉力支持冀免貽誤除將清冊分送總理衙門暨戶兵工三部查照外所

有天津機器局光緒十六年動用經費造冊報銷緣由理合恭摺

具陳伏乞

皇上聖鑒謹

奏

請獎漢納根片

光緒十八年十一月二十五日

再德國兵官漢納根在北洋效力有年前因監造旅順口礮臺工
程堅固蒙

醇賢親王於光緒十二年出海校閱案內奏奉

懿旨賞給三等第一寶星並蒙

加恩賞給三品頂戴在案該洋員感激圖報近年監造威海衛日
礮礮臺營房藥庫等工仿照西洋新式將一切做法不憚煩難逐
細講求悉心指授俾在工員弁匠役皆知則倣實兼總司教習之
功於海防頗有裨助現在差滿回國著有成勞自應優加獎勵合
無仰懇

天恩俯准將漢納根比照總教習

賞給二等第三寶星以資觀感除俟奉

旨後由臣飭令照式製給並咨總理衙門迅速繕給執照外理合
附片具陳伏乞

聖鑒訓示謹

奏

潘鼎新奉賢建祠片

光緒十八年十二月十二日

再據江蘇松江府紳士內閣中書胡祖謙等三十五人聯名呈稱
咸豐末年粵匪竄擾江浙黃浦江以東廳縣皆爲賊據逆氛偏近
上海其東南毗連浙界尤賊蹤出沒之區同治元年忠侍各逆由
浙竄入號稱二十萬在浦東各要隘設立堅壘圍犯上海情形危
急故統領鼎新前任廣西巡撫潘鼎新率領偏師由南匯之周浦
鎮進兵攻克奉賢南橋鎮收復縣城疊毀新場杭頭鎮賊壘追至
南匯收降賊眾遂復其城乘勝進克川沙鹽金山衛殲斃髮逆無
算浦東一律肅清松滬始得按堵是數百萬生靈出水火而登衽
席皆該故撫血戰之力奉賢爲立功最先之地感戴尤深擬在縣
城捐建專祠藉申報饗又前任江蘇陽湖縣知縣楊溥先隨該故
撫軍營帶團勦賊後署奉賢縣篆時甫經收復流亡滿野該故令

內籌招撫外襄軍旅繕治城郭轉運兵食地方賴以靜謐後因游勇煽亂劫掠該故令帶勇往捕猝被戕害士民至今痛惜其死事情形曾經奏蒙

恩旨優卹有案擬請一併附祀等情呈請具奏前來竊臣於同治元年治兵東下時全吳相繼淪陷獨恃上海一隅以爲規復之地黃浦江以東各城北蔽松滬南連嘉湖爲江浙門戶大股逆匪方以全力據守與上海僅隔一水岌岌可虞經臣檄派該撫潘鼎新帶隊進剿疊克奉賢南匯川沙金山各廳縣一律肅清臣卽奏明令其統領浦東防務嗣由金山進克浙江平湖海鹽乍浦各城遂會諸軍攻克嘉興府城復會浙軍攻克湖州府城其間如沈蕩新豐鎮晟舍等處疊次血戰掃蕩賊壘尤爲奇捷嘉善嘉興爲悍賊死守之堅城牙距旣摧次第戡定當時疊蒙

諭旨稱爲目擊猛攻克拔堅巢督隊苦戰克復名城者也伏查恢復浙西列城潘鼎新之功爲多而實以克復浦東爲根本松滬各處恃以保全該紳等感念前功請爲捐建專祠足見公論在人遺愛未泯前署奉賢縣知縣楊溥崎嶇兵間拊循遺黎盡心民事實爲一時循吏猝值變亂竟以身殉至今士民尤爲哀思合無懇天恩俯准該紳士等所請爲已故廣西巡撫潘鼎新在奉賢縣地方捐建專祠列入祀典由地方官春秋致祭並將已故知縣楊溥附祀出自逾格

懇施理合附片陳請伏乞

聖鑒訓示謹

奏

收留山東退還機器片

光緒十八年十二月十九日

再查山東前因疏濬黃河經故撫臣張曜向德商信義洋行訂購荷蘭公司機器挖泥船一艘議定鈔價合銀六萬九千八百八十兩該船到滬經撫臣福潤派員查驗喫水較深難以駛進黃河擬將定銀認虧議退船隻洋商不允臣接德國使臣巴蘭德來函堅持原訂合同請將此船給價收用當飭津海關道盛宣懷與洋商再四磋商減去銀一萬九千八百八十兩除張曜任內付過定銀一萬兩再由山東河防局並山東海防捐內各付銀二萬兩共給價銀五萬兩作為完結東省因該船不能駛進黃河久擱無用必致廢棄惟天津海口尚可駛入臣查直隸東淀一帶為大清河諸水所匯歸實為宣洩羣流之樞紐近年河身淤墊時常氾濫若以此船移濬淀河尚可化無用為有用應俟來年四月間酌派輪船

赴滬拖帶前來察酌安置除將該船歲需經費飭局籌議勻撥外
謹會同山東巡撫臣福潤合詞附片具陳伏乞

聖鑒謹

奏

籌撥新疆鎗礮摺

光緒十八年十二月二十三日

奏爲遵

旨籌撥新疆邊防需用鎗礮並酌派熟悉操法弁勇籌給口糧運

費恭摺仰祈

聖鑒事竊臣承准軍機大臣字寄光緒十八年十二月十二日奉

上諭現在新疆籌辦邊防須用新式過山快放礮三十七四十七

密里口徑等式各數尊各項新式洋鎗一二千桿著神機營王大

臣北洋大臣李鴻章酌量撥給配齊藥彈行知甘肅新疆巡撫派

員迎提應用並著該王大臣等遴派熟悉演放鎗礮人等隨同前

往等因欽此伏查新疆地接強鄰近因南路議界未定邊防尤關

緊要亟宜訓練軍實先事籌維前接新疆撫臣陶模函稱該處現

存外洋軍械均係十年前購備多已損壞商由臣代購後膛毛瑟

馬鎗一千桿前膛兵鎗一千五百桿分批解運並派熟悉德國操
法之武備學生二名隨同前往業將第一批鎗械於十月間由津
起運明春可抵新疆正當續籌撥運茲復欽奉前因仰見
聖明洞燭萬里欽服莫名遵查天津軍械局有購備三十七密里
過山快放礮係德國葛魯森廠製造最新之式疊次校試一分鐘
時可放子二十四出及遠二千五百密達能用騾馬馱運過山輕
靈快捷用於新疆邊境山嶺叢雜之處最為相宜現擬撥給六尊
隨礮開花子彈三千箇並撥後膛哈乞開思六響步鎗一千桿隨
鎗子彈五十萬粒隨帶車架器具零件選派熟習演放之管帶哨
官一員哨長一員教習二名礮目什長及兵勇三十八名酌照淮
軍行營章程配齊長夫火夫隨礮前往至新疆後認真教練再由
該省酌量添練鎗隊足成一哨以為護礮之用可期得力查德國

礮隊章程以六礮爲一隊每礮應用駝運礮身器具車輪等件馬四匹又駝運備戰子藥騾二匹照章騾馬七匹用夫二名所需夫馬應俟運至後山該省自行配用現擬購騾十二匹交該弁等乘騎護運新式礮身機件器具異常精巧在邊省沙漠之地尤須隨時油擦應照海防各營章程月給礮費勤加油飾免致鏽損該弁勇等遠役九千里歷時四五月應先籌給口糧六箇月仍另發給盤費俾利適行運至後山該省按月接支口糧應需車輛現由天津雇備運至西安後再由各該地方官按站妥爲接運此項鎗礮係遵奉協撥之件暫由北洋海防經費項下核辦無須由新疆籌還價值所有弁勇人等口糧盤費騾價車價等項一併飭局籌撥事竣核實報銷車價一項因遠道運送器件繁重均按民價發給事屬創辦未便以例價相繩致多窒礙除將礮隊應需夫馬餉數

及月給破費章程咨明新疆撫臣查照辦理並迅速派員沿途迎
提暨分咨各衙門及經過各省督撫臣查照外理合繕摺由驛覆
陳伏乞

皇上聖鑒謹

奏

李文忠公奏稿卷七十五